

四庫全書

集部

欽定四庫全書

明詩綜卷七

翰林院檢討朱彞尊編

朱右 三首

右字伯賢臨海人洪武三年召修元史六年修  
日厯除翰林院編修七年修洪武正韻尋遷晉

府長史有白雲豪

張楠渠云伯賢感興當不在  
魏晉下郭公葵云伯賢廣

琴操出人意表非徒擬而作將歸操云九州博  
大兮將予遂之聖人待天下之心也猗蘭操云

子如好修維我之求子如不好于我何郵道在  
我躬安於命也龜山操云周公上天奈龜山何  
家國之治否實存乎其人也拘幽操云日月有  
明容光弗留輔相之蔽也岐山操云既有吾土  
毋戕吾民太王之志也履霜操云民生有知以  
順天賦天下之為父子者定矣殘形操云曰修  
爾躬自天之佑君子惟自修而已琴操作於  
韓子之後立言尤難其宜與古人並傳哉

靜志居詩話元史初成為期不過六月故極其  
牽率徐大年詩所云草草便垂千載後遲遲難  
俟百年餘是已李善長表進文亦云據十三朝  
實錄之文成百餘年粗完之史於時以順帝三  
十六年事無實錄可徵未為完書孝陵復詔儀  
曹分遣呂復張贊歐陽佑黃盅等一十二人分  
行天下凡涉史事者令郡國上之又遣儒生危  
於等歷燕南北開局於故國子監採訪文字請

行中書官印封識達京師三年二月仍命宋濂  
王禕為總裁官續完元史纂修一十五人右與  
崇德貝瓊廷珩義烏朱世廉伯清青田王廩希  
陽嘉定王彛常宗金華張丁孟兼河南高遜志  
士敏江陰張宣蓀仲當塗李汶宗茂吳張簡仲  
簡青城杜寅彥正東平李樾暨俞寅殷弼而趙  
堦伯友仍與其列以是年七月竣事其牽率猶  
如故也獨怪宋王諸公負一代重望即伯賢當  
日亦以理學文章自命於春秋傳國語則有類  
編於戰國先秦兩漢則有秦漢文衡於唐宋則  
首定韓柳歐陽曾王三蘇文為八先生文集於  
元則有文穎而又於史則有歷代統紀要覽通  
鑑綱目考證其言曰凡民之欲足而止惟學不  
可以足而止可謂有志者矣宜其在局討論精  
詳用成信史乃任其繁蕪重複遂出宋金諸史  
之下何哉良由孝陵猜忌諸臣畏觸逆鱗表進

之書不復更其隻字但就庚申君事補綴與前編絕不相蒙致有一人而作兩傳者史至此驚  
蛺蝶之不如矣白雲彙凡十卷予僅鈔得前五  
卷止有琴操無詩其後五卷僅得內閣本一過  
眼恨未鈔成足本琴操有郭公葵跋公葵吾鄉  
人唐處敬詩云我昔居秀州友有徐一夔好為  
古文章自矜少所推每論其鄉人屈指二三希  
云有善詩者郭姓字公葵不習時所好刻意追  
古詞前後數百篇一一皆珠璣郭  
名秉心惜其詩無一存者可歎也

遣興

幽逕何偏側蔓草役行路此生苦不辰出門畏多露遲  
回蒙山居仿像商顏步籍籍春花萎冉冉芳年度寄語

素心人朱顏恐非故

次韻荅白雲悅禪師

向來同覽赤城霞  
山寺吟行石徑斜  
來往風流成二老  
大章交好屬通家  
平安屢問東橋竹  
寄遠曾將小院花  
支遁肯酬南陽約  
相期歲晚度年華

春懷

舵樓空闊望京華  
蘆荻江楓岸花山  
色漸濃昏霧薄  
水光搖動夕陽斜  
故鄉鴻鴈書千里  
遠浦牛羊屋數家

邊塞柳營多苜蓿石田徒憶舊桑麻

朱世濂 一首

世濂一名廉字伯清義烏人明初薦授釣臺書院山長洪武三年續修元史被召史成乞歸復與修日厯除翰林院編修遷楚府長史

瀧湫和韻

竹外煙浮僧煮茶草邊風暖鹿眠沙青鞵何處看山客瀑布巖前數落花

張孟兼 三首

孟兼名丁以字行浦江人徵為國子學錄與修  
元史以太常丞出為山西按察司僉事遷山東  
按察副使為吳印所訐論棄市有集

詩話孟兼與景濂同里景濂薦之朝伯溫侍孝  
陵論一時文人謂宋濂第一其次臣不敢多讓  
又其次孟兼也然負才傲物屢凌其鄉曲及請  
假還縣令丞門謁奉牲酒孟兼坐受其拜不答  
麾酒却之其亦無禮甚矣當其之官山西景濂  
以文贈行有云驚鳥之揚揚不如威鳳之離離  
獅狔之矜矜不如祥麟之容容刑法之堂堂不  
如德化之雍雍雍人不務德則已苟有德焉又何



儉士之不革其行孟兼盡於此而留意哉景濂  
可謂盡朋友相規之義矣卒之怙終不悛與吳  
印爭許印兩上封事言狀帝怒械至闕下命衛  
士捽髮掠之垂死論棄市詔印曰吾除爾害矣  
善為之噫印一鍾山寺僧爾帝寵任之校室賜  
金至為之復讐必期快其意而後已毋乃過與

# 漫興

二首

詩話杜子美集有漫興五絕九首又七言云老  
去詩篇渾漫興春來花鳥莫深愁渾漫興者言  
即景口占率意而作也其後蘇子瞻黃魯直楊  
廷秀諸公皆襲用之押入語韻姜堯章詠蟋蟀  
詞云幽詩漫興笑籬落呼燈世間兒女段復之  
詞云詩句一春渾漫興紛紛紅紫俱塵土陰時  
夫輯韻府羣玉亦采入語字韻中蓋自元以前  
無有讀作漫興者迨楊廉夫作漫興七首妄謂

學杜者必先得其情性語言而後可得其情性  
語言必自其漫興始而其弟子吳復見心從而  
傳會之注云漫興者老杜在浣花溪之所作也  
漫興之為言蓋即眼前之景以為漫成之辭其  
言語似邛而未始不俊此杜體之最難學者自  
康夫詩出而世之人遂盡改杜集之舊易與為  
興矣首沿其誤者張孟  
兼也存其詩特糾其謬

梨花半開夜雨催無奈  
李花如雪堆門外  
美人不見來  
東風楊柳吹千迴

青驄驕嘶金鞵銜美人  
二月裁春衫江頭麥秀青  
蘄蘄  
西湖放船開錦帆

義門鄭仲舒先生得請歸浦江予於先生同里且  
親故賦是詩情見乎辭矣

鄭公去年離北平束書抱病來南京城隅邂逅喜且驚  
開顏握手言再生自從南北屢構兵日夜悵望鄉關情  
幾回寄書鴈南征中心搖搖若懸旌苦遭喪亂百病嬰  
客邊囊橐一旦傾此來四顧徒甃甃豈料吾子與合并  
我時聞之涕泗橫况公素有文章名居官勝國職最清  
經筵之擢轉庠黌及當玉署宦已成又為奉常典梁盛

人生際此自足榮但恨白髮已數莖懷哉屈子全忠貞  
誼與日月同光晶願言夕餐秋菊英佩明月璫紉菰蘅  
懸河之論春雷轟使旁觀者顏發頰索居半載留帝城  
坐聽夜雨哦寒檠眼前倏忽時變更春風一見衰草萌  
公家孝義好弟兄遣兒千里來遠迎乃令得請荷聖明  
身若插羽乘風輕過門云別明遂行開船要趁蒸雨晴  
夜久不寐視長庚長庚欲落鐘鼓鳴庭樹喔喔聞雞聲  
崩緌起舞冠絕纓公歸我愁絲亂縈亦有夢寐懷先塋

如過吾父款柴荆為言恨不同趨程終當早晚乞歸耕

王 彛 二首

彛字常宗嘉定人以布衣召修元史賜金幣遣  
還尋薦入翰林以母老乞歸洪武七年坐太守  
魏觀事伏法有三近齋稿

詩話常宗自號媯子學有淵源集中孔子廟  
學碑南門記鄉飲酒銘文甚高潔時鐵崖以文  
雄東南傾動一世常宗獨作文妖一篇詆之其  
畧曰天下所謂妖者狐而已矣俄而為女婦而  
世之男子惑焉則見其黛綠朱白柔曼傾衍之  
容無乎不至雖然以為人也則非人以為婦女

也則非婦女而有室家之道焉此狐之所以妖也文者道之所在曷為而妖哉浙之西言文者必曰楊先生子觀其文以淫詞謫語裂仁義反名實濁亂先聖之道顧乃柔曼傾衍黛綠朱白奄然以自媚宜乎世之為男子者之惑之也子故曰會稽楊維禎之文狐也文妖也意狐之妖至於殺人之身而文之妖往往後生小子羣趨而競習焉其足為斯文禍非淺小也文而可妖哉妖固非文也世蓋有男子而弗惑者何憂焉誦其文可謂獨立不懼者矣其為詩若神絃四曲露筋孃子篇尚沿鐵崖流派而集外有題宋復古鞏洛園六言云斜陽欲雨未雨別嶺歸人幾人峰迴忽見月出穉子相迎澗濱頗有摩詰文房遺韻又題宋徽宗畫百合園云偶為美名園百合不知南北已八分亦有思致

秋林高士圖

嵐峰半殘陽彩翠明林杪僧塢遠鐘微歸人下山少風  
杉落葉響驚起棲煙鳥攜手願言還前邨月初皎

東歸有感

路斷江淮已足憂繁華猶自說蘓州萬人金甲城頭騎  
十丈朱旗郡裏樓麋鹿昔遊何處草鴈鴻不似去年秋  
忍將一掬東歸淚付與婁江入海流

張宣

十四首

宣字藻仲初名瑄江陰人洪武初與修元史擢翰林院編修既而謫濠道卒有青暘集

詩話藻仲入翰林年未三十孝陵以小秀才呼之既奉詔歸娶卽亨貞女宋學士送之以詩所傳紅錦裁雲春莫鴈紫簫吹月夜乘鸞是也及謫濠道卒以詩辭其父溝南先生端云出世再當為父子此心終不間  
幽明誦之使人心惻

### 孤鳳吟

梧桐生高岡枝葉菀成林上有孤飛鳳結巢在其陰毛羽爛五采噉噉鳴好音虞舜去已遠王風不可尋來儀



苟非時亦何異凡禽

九日偕張思廉楊孟載徐二岳登虎丘

招提憑崇岡石壁根空虛躋攀陟層巔歷覽壞劫餘清  
商振穹昊爽氣棲平蕪雲消初旭吐木落遙峰孤幽潭  
積水深修綆斷轆轤劒光欲飛騰神物今有無空令弔  
古人解笑英雄愚撫茲良辰及感我芳情紆長揖當塗  
者永與山林俱

與慈邑諸公會宿茅甫生駐鶴樓得夜字

白水冒平田積陰過初夏風雨招友生琴尊相慰藉飛  
梯倚孤撐連峯競迴迤晦冥巖壑變空翠林木亞疎煙  
截山椒微月露天罅僧鐘隔遠寺漁父候歸舍鶴影渚  
雲迷風聲澗泉罷投迹山水邦脫身紛俗駕久忘簪組  
累不待休沐暇飲酣心為壯時危氣逾下佳會不再期  
茲遊偶來乍雞鳴起營營莫忘永清夜

游四明山

野人放浪山水情小弄雲海游四明半空下見日光動

中夜起聽天雞鳴松風濤卷出萬壑耳邊無處無秋聲  
綠蘿碧澗月欲上澹煙遠岫天低橫山中招隱者誰子  
相看擬和游仙行山川奇絕境復清秀色可攬難為名  
安得仙人衛叔卿身騎白鹿下來迎粲然一笑白雲裏  
授我寶訣教長生

虞姬

楚歌四面秋聲起美人如花帳中死重瞳將軍蓋世雄  
淚流暗逐烏江水妾身妾身何足數八千健兒棄如土

空留恨血漬平原碧草無風為誰舞

王昭君

却手為琶翻為琵琶馬上風裂宮中衣玉闕將軍兵百萬  
恨君枉殺丹青師穹廬夢斷悲笳曲淚眼朦朧漢宮燭  
荒邱遺恨草離離猶帶千年土花綠

石門待謝雪坡不至

古戍人何在春程驛尚存驅雞啼上樹秣馬出前邨白  
雨侵江郭青山對石門謝公游宿處清興與誰論

桐廬舟行

自在眠沙鳥參差上瀨船  
亂峰寒笛外疎雨暮鐘前  
灘轉旋無路林深別有天  
羊裘懷隱者高節已千年

錫山道中

風起晚淒淒愁雲墮漸低  
近人山鬼泣當路竹雞啼  
百里無煙火孤城只鼓鼙  
故園楓樹外歸夢遶梁谿

送胡季城之官陽朔

桂林南望八千里陽朔郵程又在西  
峒峒皆為矜狘住

山山惟有鷗鵠啼天垂海國鄉關遠雪壓江城草樹低  
恨不從君拜虞舜目窮閭闔意淒迷

得鄧南隱書時在廣西

風塵擾擾干戈際兩地俱為淪落人夢見亦憐風度好  
書來翻遣別愁新枕榔葉暗蠻溪雨荔子花濃海嶠春  
壯志幾回思奮迅出門誰慰白頭親

題冷起敬山亭

石滑巖前雨茶香樹杪風江山無限景都在一亭中

畫梧石

鳴琴罷瑤席鶴夢清宵警涼月下前除照見梧桐影

送鄭希本還徽州

從親南國久為官話別江城歲欲闌三百灘聲流月色  
青山多處是新安

張簡 二首

簡字仲簡吳人初師張伯雨為黃冠元季兵亂  
以母老歸養遂返巾服洪武初召修元史有白

羊山樵集

顧仲瑛云仲簡詩澹雅有陶韋風  
王子充云仲簡詩溫麗清潔有類韋

柳

詩話饒介之分守吳中白號醉樵延諸文士作  
歌仲簡詩擅場居首坐贈以黃金一餅高季迪  
白金三斤楊孟載一鎰今  
其詩載集中殊不見好

次韻張田秀才見寄

樹杪青蟲晴飈絲春城風物似年時  
貧餘許邁餐金法  
閒有陶潛飲酒詩芳草青青連野閣  
征鴻歷歷度江遲  
長洲故苑煙花外千里懷人入夢思



游石湖治平寺用唐人許渾所題詩韻

湖上春雲挾雨來，楞伽山木盡低摧。  
吳王廢冢花如雪，猶自吹香上舞臺。

貝

瓊 四十二首

瓊字廷琚，一名闕，字廷臣，崇德人。洪武初徵修元史，除國子助教，遷中都國子助教。有清江集。

詩話：姚文公燧為承旨時，一日玉堂宴集，聲妓畢奏，有真真者，操南音，公疑而問之。泣對曰：妾建寧人，西山之苗裔也。父司篋庫於濟寧，坐盜用縣官錢賣妾，以償，遂流落倡家。公憫之，遣使

白丞相三寶努為落籍且謂翰林屬官王棟狀  
華曰汝無妻以此姬配汝吾即其父也貲裝皆  
出於公棟後官翰林待制廷珣為作真真曲以  
紀事盛傳於時廷珣從學於楊廉夫其言曰立  
言不在蕲絕刻峭而平衍為可觀不在荒唐險  
怪而豐腴為可樂蓋學於楊而不阿所好者也  
其詩爽豁類汪朝宗整麗似劉伯溫圓秀勝林  
子羽清空近袁景文風華亞高季迪朗淨過張  
來儀繁縟愈孫仲衍足以領袖一時此非鄉曲之私天下之公言也

## 行路難

采玉于閩河問君勅律何時過采珠鮫人室問君百粵  
何時出珠玉歲久同為塵君何重利不重身海有波缺

我楫山有石摧我輪行路難出門即羊腸何況萬里道  
管叔危周公匡人仇魯叟尊有酒盤有壺鼓坎坎歌烏  
烏海不可涉山不可徒路旁之人愛爾玉與珠行路難  
我以為父安知非虎我以為兄安知非狼仰天悲歌泣  
下霑裳

郊居

直木惡為輪疲馬思卷旆匡時既非才處約斯寡悔采  
詩鑒興亡讀易明進退永懷嵇阮放甘與沮溺對

送潘時雍歸錢塘

海縣兵未息公子今何之酌君葡萄酒聽我白苧詞憶  
昔來黃灣始為童子師連牀風雨夕秉燭聽新詩殷殷  
金石聲真足解我頤同居石壁下斗柄倏三移脫畧勢  
利交所貴兩不疑久懷地主恩亦有尊鱸思束書向錢  
唐磬折從此辭錢唐實都會西湖天下奇朱樓起相對  
上有千蛾眉樓前五陵子並馬金鞭垂酒酣復張樂但  
惜白日馳近者屬彫喪不及全盛時空山鳳皇去月黑

號狐狸春風吹行殿碧草生荒基何當從子游觀濤  
鵠夷子實濟時具飛騰方在茲匠石既已遇小大隨所  
施從容宰相前奮舌論安危豈無一尺箠盜賊不足管  
天空羽毛急水涸舟楫遲臨歧更揮淚中年傷別離

答客

竊祿非本性適彼南山阿藜藿日不充慷慨獨商歌有  
客向我言與世同其波商君震七國季子傾三河區區  
守章句白首成蹉跎念之為三歎所樂良已多潛魚駭

釣餌飛鳥愁網羅結駟非不榮違已當如何

春日宴滄州

并序

歲在著雍涖灘春三月一日筠谷高士合賓客  
序兄弟飲於滄州一曲平池湧翠高閣延青圓  
景中天繁陰四合微颺遠激幽芳襲人清醪在  
壺嘉肴既旅懲蟋蟀之刺儉美伐木之求友終  
宴忘疲遷坐復酌鳴葭間發協朱鳳之相和舞  
袖雙回翩驚鴻之欲舉嗚呼蘭亭金谷會豈能

常滄海流沙兵猶未息懟神仙之無驗宜曠達  
以為高用綴新篇以紀雅集詩曰

天闊無留雲山明洗新黛過從屬休暇置酒滄州會  
柔荑綠堪藉雜英紅尚在累觴既不辭秉燭還相對清彈  
促哀響祕舞呈修態蘭亭今已矣金谷徒增慨大化會  
有終四時寧復貸厭厭夜無歸從人譏倒載

早春

山寒花尚遲雪霽江已綠懷新感游子哢節喧衆族且

同尊俎樂幸免章綬束更擬登前峰青郊可遊目

擬東野

破屋夜通月霜氣刀稜稜病骨不受寒  
卒歲仍無繒殘燈吐復翳僵卧如凍蠅  
事業漸蒸沙文章空鏤冰已失國士意  
頗為少年陵長歌獨慷慨坐候東方升

四月十日兒子翔翻來鳳陽留一月遣歸因令早  
營草堂爰山下為止息之所

老病不得歸獨處長戚戚二子江南來眼暗初未識生



常戒垂堂肌肉如雪白一月常塗間海風吹盡黑買酒  
為相勞問荅向中夕迢迢漢陽簿春來斷消息阿宣在  
母旁頗知工翰墨艱難且撥棄頓使沈憂釋所媿無定  
居百歲半為客經營須及早尚愛龍湫僻况近讀書臺  
雲銷四山碧泉深出丹砂地冷多琥珀既非匡世資庶  
遂陶阮逸良辰戒僮僕息忽及南北五月方鬱蒸日氣  
成霞赤出入非所宜川陸慎所歷惜別豈無淚向汝難  
再滴秋江有鱸魚當挂吳淞席

次韻鐵崖先生醉歌

先生愛酒稱酒仙清者為聖濁為賢清江三月百花合  
江頭日坐流萍船左攜張好右李娟紫檀雙鳳鳴雞絃  
傾家買酒且為樂老婦勿憂無酒錢白日西沒大東旋  
秋霜入鏡何當玄蓬萊有路不可到祖龍已腐三重泉  
何如快飲三萬日酒樓即起糟丘邊願持北斗挹東海  
月落枕股樓頭眠

穆陵行

并序

至元中西僧嘉木楊喇勒智利宋諸陵寶玉因  
倡妖言惑主盡發攢宮之在會稽者斷理宗頂  
骨為飲器璉敗歸內府九十年矣洪武二年正  
月詔宣國公求之得於僧汝訥所乃命葬金陵  
聚寶山石以表之予感而賦詩

六陵草沒迷東西冬青花落陵上泥黑龍斷首作飲器  
風雨空山魂夜啼當時直恐金棺腐鑿石通泉下深錮  
一聲白鴈度江來寶氣竟逐妖僧去金屋猶思宮女侍

玉衣無復祠官護可憐持比月氏王寧飼烏鵲及狐兔  
真人欸見起江東鐵馬九月踰崆峒百年枯骨却南返  
雨花臺下開幽宮流螢夜飛石虎殿江頭白塢今不見  
人間萬事安可知杜宇聲中淚如霰

已酉清明

白苧衣鮮紫騮馬清明酌酒梨花下馬蹄一去不復來  
梨花又見清明開城南城北多新墓日落啼鴉滿高樹  
有酒誰澆千歲魂子孫盡發濠州住主人更勸金叵羅

阿蠻起舞玲瓏歌生前不飲君如何

予避地千金圩屢游父史兩山酒酣興發賦詩一首  
首惜山中無賞音者姑錄以自娛云

神人夜割蓬萊股蒼然尚作青獅舞父基得道此飛騰  
煙火千家自成塢前年盜起官軍下存者如星纔四五  
我來欲置讀書牀出入未愁穿猛虎山寒月黑無人聲  
夾道長松作風雨佩環何日歸公主泉下銅棺閔千古  
石仆麒麟罷官守林宿鷗鴉聞鬼語苦耽勝槩惜殘年

共說當時悲老父錦繡池臺已零落田翁八十鉏新土  
傷哉土俗如巫覡伏臘荒祠沸簫鼓祠旁鑿井深不枯  
雲氣隨龍有時吐試上崔嵬望沃洲直將培塿齊天姥  
春前野桃渾欲放雪盡黃精亦堪煮興來起挾李長庚  
重賦琵琶雙玉女

郭忠恕出峽圖

巫峽何危哉夾拱如龍門禹治九州不得到此峽口水  
作雷霆奔問汝江中人幾日三巴去我眉五月銷古雪

灩澦堆深虎須怒巫峽之險安可攀胡為吳檣楚柁日  
日來往乎其間高堂中有如花顏銀屏翠箔青春間涉  
此萬里道經年猶未還黃金不買死直欲高南山汝舟  
非龍汝非虎鼉鼉出沒饒蛟舞前者已脫後者號江神  
無情天又雨石巉巖兮利刃攢一葉宛轉行千盤覩此  
魂魄悸豈待杜宇夜叫猿聲酸安得鑿之盡平土萬古  
不識風波苦

送進士霖歸天台

赤城雲氣神仙家千樹萬樹蟠桃花十二樓臺起花外  
石門水長通烏麻當時劉郎亦草草出山却憶山中好  
莫信丹丘日月長玉人已共桃花老山空水流雲自飛  
劉郎看花須早歸

題董源寒林重汀圖

天下畫師無董源學者紛紛工水石雲山萬里出巴陵  
白首淮南見真蹟亂石平坡淨無土松根裂石蟠龍虎  
偃蓋千年飽雪霜林深六月藏風雨江上邨墟何處入



浮空遠黛蛾眉溼漁人日暮各已歸小舟如鳬落潮急  
我昔西清常看畫南唐此本千金價坐移絕境在雲間  
月出霜猿啼後夜薄游未挂吳淞帆令我一夕思江南  
安得買田築室幽絕境開窓日日分晴嵐

十月十三日過梧桐涇時官籍濮彥宅龐氏唐氏  
自經感而賦之

天寒水清石齒齒杏葉初黃豆花紫舞榭歌臺不見人  
頭白烏啼明月裏當時豪俠輕五侯一榮一枯八十秋

綠珠亦解死金谷草露作淚無時流

冬夜

歲月悲游子風塵老腐儒  
兵交連北冀客隱向東吳  
草白秦皇道天青陸瑁湖  
昔時尋樂處撫事一長吁

排悶

白首尚為客飄飄天一涯  
耳鳴通夜雨眼暗隔年花  
畏酒從今斷題詩浪自誇  
有邨如栗里準擬便移家

夜泊武塘

風帆如健馬一日過嘉興水鳥如相喚秋蚊尚可憎照  
人明月近接地白河澄耿耿渾無寐中宵對玉蠅

橫港

南行入橫港茅屋到林丘落日猶斜照寒潮忽倒流牛  
羊平野散鵝鴨小溪浮嘉見平生友籬邊一繫舟

除日守歲

守歲西清第幽懷強自寬極慚公子意須盡老夫懽明  
日王春始疎星客夜闌殷勤一杯酒到手莫辭乾

晚眺

極目三邊靜傷心萬室空  
斷山明落日飛藿卷回風  
漢節無歸使樵歌有野童  
煙塵幾時息歸釣古城東

送胡鼎文同知赴安州

別駕安州去青天蜀道危  
近辭丹鳳闕遠過碧雞祠  
暮雨歸神女春風怨子規  
宦游多好思重和杜陵詩

壬子冬至日過來青堂示勉中祖南二友

衣冠且從俗猶有晉風流  
我愛陶貞白人稱馬少游  
蜂

房寒未割雞柵暖宜修不必論三仕何如號四休

送王克讓員外赴陝西

貂裘萬里獨衝寒舊是含香漢署官  
白雪作花人面落青山如鳳馬頭看  
關中相國資王猛海內蒼生望謝安  
應念東南有遺佚采芝深谷尚盤桓

十月聞雷

天氣初寒春尚賒坎中夜半有鳴蛙  
百年宇宙喧戎馬十月雷霆起蟄蛇  
老柳黃垂霜後樹小桃紅破雨中花

三公變理無非術愁聽空江度鬼車

清明日陪楊鐵崖飲城東門是日風雨

盪舟撾鼓出東門怪雨盲風野色昏  
海上一春猶作客樓頭三日共開尊  
青山石馬新人冢錦樹黃鸝舊相園  
快意百年須痛飲轉頭何處不銷魂

即事

少海旌旗落照中沙陀兵馬鴈門雄  
朝宗久廢諸侯禮翊戴方尊節度功  
今日宣宜求騎劫當年應失倚全忠

丹書鐵券存終始萬古山河帶礪同

經故內

山中玉殿盡蒼苔天子蒙塵豈復回地脈不從滄海斷  
潮聲猶上浙東來百年禁樹知誰惜三月宮花尚未開  
此日登臨解題賦白頭庾信不勝哀

雨中書懷

漢苑秦宮跡已陳金沙一簇為誰新山河有限空懷古  
風雨無情只送春南國鷓鴣愁北客東家胡蝶過西鄰

尊前莫唱昇平曲白髮秋孃也自顰

秋思

雨河兵合盡紅巾宜有桃源可避秦馬上短衣多楚客  
城中高髻半淮人荷翻太液非前日花落蕃禧又暮春  
莫上高樓望西北遠山猶學捧心顰

庚戌九日是日聞蟬

今日出門風雨收東山西山須可遊那能束帶從王事  
且復開尊破客愁鴈別紫臺初避雪蟬鳴紅樹不知秋



桃花細雨應相笑歲月無情自白頭

送楊九思赴廣西都尉經歷

叩笮康居路盡通西南開鎮兩江雄漢家大將推楊僕  
蠻府參軍見郝隆象跡滿山雲氣白雞聲千戶日車紅  
明珠薏苡無人辨行李歸來莫厭窮

過泐季潭長老三塔院飲於志遠宅賦詩

城南看花花正開清明微雨灑塵埃路從周處臺前過  
山轉曹彬廟下來墮地遊絲輕復起近人嬌燕去仍回

高歌擊節狂懽賞共盡生春酒一杯

父山隱居夏日

病客從教懶出邨  
兩山一月雨昏昏  
野花作雪都辭樹  
溪水如雲忽到門  
無復元戎喧鼓吹  
試從田父牧雞豚  
來青處士時相過  
猶是平原舊子孫

懷內弟陸熙之

我別語兒溪上宅  
月當二十四迴新  
如何故國尚戎馬  
即恐比鄰非昔人  
簫鼓誰家猶作社  
樓臺廢苑不成春

夜闌憶爾無由見，悵望黃姑析木津。

秋興和方丈敏

一日龍飛濠泗間，橐駝牛馬走賓顏。已來肅慎通滄海，更却呼韓閉玉關。使者旌旗分道出，將軍部曲凱歌還。白頭野老知何事，紫氣長瞻萬歲山。

送馬伯溫之廣西

樓船槌鼓發江中，昨夜檣烏喜北風。可惜春歸還送客，何知別後已成翁。浮天雪浪三湘闊，到海雲山百粵通。

有子漢陽專簿領一緘千里託飛鴻

遣興

我住雲間今四秋恰如杜甫在秦州賦詩黃耳冢前去  
打鼓白龍潭上游暮景飛騰如過翼此身浩蕩一虛舟  
黃塵紫陌繞車蓋且伴老翁隨海鷗

讀蘆笳曲

日年已到甲辰終休倚山河百二雄八駿何勞巡海上  
一龍今見起江東專門學士空談道仗鉞將軍競策功

忍聽蘆笳舊時曲此身飄泊歎秋蓬

黃灣述懷二十二韻寄錢思復

海岱初雲擾荆蠻遂土崩王公甘久辱奴僕盡同升  
遠適將妻子端居謝友朋草堂森苦竹瓜圃蔓寒藤  
地盡山光斷天昏海氣蒸夜深常畏虎秋後更多蠅  
鶴髮愁難理烏皮嬾自凭娉婷羞不薦齷齪怯先登  
拔劍歌誰和聞笳寢復興過逢欣已絕疾病恨相仍  
自擬秦民去重煩魯使徵吹毛多見摘刺舌尚須懲  
耆老惟君在文

章對客矜才全懷白璧道重比朱繩虎榜名非忝雞林  
價重增極知童子陋深媿大巫稱最憶春停騎高談夜  
翦燈病駒終棄擲生鶻必飛騰跡已從信屈時多任愛  
憎賦詩閒莫廢好事老猶能漢月今頻滿天河本自澄  
山陰有孤櫂雪下興還乘

壬子夏端居二湖與二三子讀書而苦熱如焚一  
坐四遷杜少陵發狂大叫非過言也回思雲間時  
往來呂邵二族其地有林藪之美池臺之勝可以

避暑而游士寓公咸會於此相與窮日夜為樂及  
兵變之後所至成墟海內忘形半為異物感哀榮  
之無定悼生死之相違遂成三十四韻

地僻從吾放山深少客過昏昏蒸酷暑鬱鬱抱沈疴斷  
酒愁為敵拋書睡作魔雲生空望雨水涸不通河唱和

聞蛙吹遨遊記鶴坡輞川移絕境瀑布激懸波數子論

新好諸翁樂太和百篇齊屈賈

楊鐵崖

五字逼陰何

鄭本初

共哂佯狂徹

魯道原

焉知好辯軻

馬文璧

冰壺清莫比

夏景淵

鐵硯老猶磨

呂德厚

公子時同載

夏士大

將軍夜不訶

邵質谷

結交真有道

倪菊存

與物總無他

倪耕間

每喜方舟坐何煩

信馬馱秋風千戶竹宿露半池荷席睹藏鈎令亭邀竊

藥娥

有賓月亭

頗黎行凍蟻瑪瑙進寒蠶潦倒衣從溼敬傾

弁或俄羌人能甯粟漢女善顰婆對舞翻朱袖羣謳歛

翠蛾紛紛方大噓浩浩漸微配壺中恒三馬詩成媿一

螺如何棄俎豆却復老干戈落鴈長淮遠蜚鴻大野多

死生俱異域出處不同科淚泣荆人玉腸迴織女梭祇




憐成骭髒及此歎蹉跎室已如懸磬門今信設羅凌霄  
榮小草平地引危柯水鳥浮沈戲林蟬斷續歌分甘留  
白屋身免束青綯晚牧幽湖上春耕曲澗阿丹砂尋舊  
井金刹過祇陀宜復同般樂應知廢切磋茫然感平昔  
興發強吟蛾

殷弼一首

弼字里未詳與修元史

望海

吳淞江口海門東萬里京師咫尺通  
白柁紅旗三月浪  
紫簫花鼓午潮風



明詩綜卷七

欽定四庫全書

集部  
明詩綜卷八

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官主事臣陳墉

謄錄監生臣李克文

欽定四庫全書

明詩綜卷八

翰林院檢討朱彝尊編

徐一夔 二首

一夔字大章天台人徙嘉興元末建寧教授洪

武初召修禮書終杭州府學教授有始豐類彙

靜志居詩話實錄洪武二年八月詔儒臣纂修  
禮書徵儒士徐一夔梁寅劉子周子諒胡行簡

劉宗弼董彝蔡深滕公琰至京時曾魯以元史  
方成奏留之同纂修三年九月書成賜名大明

集禮通五十卷授曾魯徐一夔周子諒董彞以  
官梁寅等六人以疾賜還鄉里宗景濂撰楊廉  
夫墓志云國朝天下大定詔遺逸之士纂禮樂  
書君被命至京師僅百日而肺疾作乃還卒年  
七十五洪武庚戌夏五月也而梁孟敬贈徐大  
章序則云吳元年丁未歲以詔徵至都大章亦  
見徵是時置三局一律局二禮局三誥局余備  
員禮局而大章換語文同居官寺者半歲云云  
若是則禮局律局同時分設而大章孟敬俱於  
吳元年即被徵矣實錄又載吳元年八月徵江  
西儒士劉子等至官欲官之俱以老病辭各賜  
帛遣還則劉子亦以吳元年即被徵矣且劉宗  
弼者承直之字承直吳元年十月官國子司業  
不應於洪武二年又同遺逸之士並徵也又中  
書省定律令亦係吳元年十月事至十二月律  
令成命頒行之則律局可輟不煩二年猶與禮

局並存也此皆事之大可疑者相傳廉夫賦老  
客婦詞進御其辭云老客婦行年七十又一  
九按是歲己酉廉夫七十有四爾何必增並其  
齒以証孝陵邦始好事者為之又及當日同修  
禮書尚有魯淵道原實錄削而不書者以道原  
書未成時先卒也梁孟敬有輓詩載石門集大  
章遺藁罕傳余於京師見之今刑部尚書新城  
王先生貽上所凡四冊比余家藏者倍之然驗  
其目無詩猶  
未是足本也

至正己亥兵後明年八月之望同守繆公招同諸  
彥集南湖即席分韻得久字

青丘緩殛殪黑颺撼九有海走翻蛟宮山移若螳阜雖

愛赤城霞散瀑當窗牖棄擲不敢顧欲卧豈得久里處  
擇其仁於馬得林數衍原饒杭秫詩書足朋友何期復  
中兵難作在丁酉東西競奔竄顧尾不救首幸云全此  
軀長疑是夢否還見湖上月兼之對名酒狂奴故態萌  
噓然開笑口

郁伯承云僧雪廬資聖寺記至正十八年八月嘉興兵變而大章詩云難作在丁酉

是丁戊巳三年郡皆被兵也故高士敏詩亦云前年奔山壑去年匿樵船

辛丑秋七月曹廣文招同諸子憩西郭景德寺分

韻得半字



野曠天逾豁川平路疑斷不知何朝寺突兀古河岸潭  
隄白氣沒林密翠霏亂勝地固清涼火流七月半合并  
洵難得通塞奚足算廣文厭官舍亦此事蕭散風櫺櫓  
屢行羅磴席頻換但覺清歡發寧顧白日旰吾欲紀茲  
游埽塵勞弱翰

梁寅 二十四首

寅字孟敬新喻人元末辟集慶路儒學訓導洪  
武初徵修禮書書成以老疾辭歸有石門集

詩話孟敬入禮局雖不為好爵所縻然石門集中賦南歸則云煌煌乎大明之盛典兮搜巖穴而旁徵承賜金之渥恩兮荷錫服之殊榮寄子岷詩云赫赫皇明文治肇興惟俊良是詢惟隱淪是徵嗟余罷老亦承詔以行東武吟云隋珠耀明月和璧誇縣蔡及時不自獻明君焉得知寓館咏懷云聖君優老無窮感京城元夕云萬里昇平感聖朝洪武元年正月四日恭觀龍飛歡忭而作詩云赫赫大明連盛代載歌周雅贊皇文感恩頌德之辭不一而足方之抱翁似有有間矣故序於通籍者之列

歸醴溪

久厭都市喧俛思山巖靜歸飲醴溪泉怡我淳樸性神

峰雜樹擁石門翠厓並蘿懸晨露獻秀夕霞映映褰裾  
陰雲松脫屣悅風磴悠然避客心疊出野人詠方期谷  
口耕毋諂終南逕

和楊逸人桃林遷居之作

心絕忘塵囂時清樂巖築愛此桃華林葺之杜衡屋葛  
籬延芳藟石梁照淺淥風翔雙白鳥雨卧一黃犢東臯  
雜婦子中野見樵牧賦詩雲霞臨攜壺錦繡谷從君以  
優游於焉謝羈束

題西山程氏南窗

獨居南窗靜秋木連翠岑鳴琴衆葉下把酒孤猿吟寧  
負朱紱願莫乖白雲心羨彼歸田叟高風留至今

為臨川章則常題山水圖

山擁衡廬青水含瀟湘碧兩厓蟠蛟樹千歲蹲虎石遙  
遙溯川舟泛泛騎驢客憑高者何人閒看楚雲白

題印土寺罷釣軒

曲池照林鵑百尺懸蘿陰開軒坐垂釣水清如我心小

魚易傷生大魚或淵沈投竿為之惻於此悔悟深名區  
縻好爵都市爭黃金但戀鉤餌馨豈知憂患侵濯足南  
澗流振衣北山岑既羞結網罟何必漑釜鬻物生免相  
賊嗜欲常自禁嘉此古人意託之金石音

擬古 六首

獨處衡門下慨然思九州我馬苦疲怯山川多阻修豐  
草被長坂麋鹿或羣遊蔚彼嘉樹陰鳴禽自相求彼物  
各有適而我何寡儔日月雙車輪恒恐不少留願與二

三友朝夕論王猷母為自局促窮廬悲白頭

芙蓉在江浦亭亭豔清波雖云出淤泥麗質良可嘉  
裳涉枉渚凌風折芳花願言贈君子翫之比瑤華於時  
苟不惜顛顛當奈何

江海處卑下百川皆赴之山木鬱蕭森上竦無繇枝王  
侯稱孤寡惟恐嬰菑危謙虛受衆益天道盈必虧周公  
下白屋吐哺情孜孜孫子相南楚祿豐心愈卑奈何閭  
閻子往往多矜持

昔嘗好名山五嶽期遍歷思見松與喬再拜問仙液微  
生累妻孥常為飢凍役歎此血肉軀何以生羽翼諒非  
金石同服食竟何益不如安我常百年順所適

雲門輟清響鄭衛音方揚錦衣受垢污不如練布良軒  
軒青雲士鳴玉升廟堂名高受讒毀寵盛罹愆殃美女  
惡女仇偏聽姦以萌衆口能鑠金況乃忘周防所以君  
子心惟用德自將行行九折坂戒哉銜檠傷

我有太古琴千年妙音續七絃何泠泠聽之非促遽一

彈文王操再彈宣父曲聖人宛見之何由躡其躅大道  
日以淪澆詭馳衆欲孰思障頽波九州反淳俗夔龍為  
股肱巢許遜巖谷窮通各有志於我奚不足

歸息 二首

歸息蒙嶺陽聊比嵩少岑樂此林藪趣遂忘江海心  
澗壑芳藟入谷聽幽禽流泉響松下潺湲非俗音猗蘭  
被徑畹香氣襲衣襟頽景忽西匿浮雲夕以陰睠彼羣  
飛鳥翩翩投北林



春陽旣和煦時雨亦霑濡原野綠已遍土潤含膏腴兵  
戈幸少戢良農日墾耰戴勝鳴桑林題鵠亦交呼嗟我  
理編簡四體忘勤劬羔裘媿逍遙梁鵜恥安居素餐古  
所誚偶耕良我徒

簡伯英伯筠見訪雨留信宿

谿谷雲晝合東林微雨來二友歛俱至一見紆中懷埽  
我茅茨室為君緇帙開上言風雅醇下言豔歌諧何以  
相淹留清醕不盈杯何以為遠贈媿無瓊與瑰煦風失

堅氷谿水流潛潛歸鴻正翱翔浮鷺散參差告我遽言  
旋定省恒懼乖懿此孝友心令德善自培願為王國士  
無媿北山萊

題番易蔡淵仲默齋

獨坐衆囂寂靈淵虛以澄樸拙固吾性佻巧非吾能言  
辭戒放逸脣頰思緘滕吉與躁殊趣仁以訥見稱訥訥  
譽何損呶呶時所憎恐玷懷白圭來讒忌青蠅無妄天  
之佑主靜道斯凝曾閔庶可慕子賜在所懲萬言不如

默誠哉宜服膺

林下

客尋林下居逕幽不待埽疎篁延柔蔓殘果落深草禽  
言人莫知虎跡僮驚報何事嬰余懷甕牖悟天道

簗谷作

老樹山橋晝瀟灑興來濯足蒼藤下雲邊厓石危欲落  
雨後泉流急如瀉客過松林貪翠陰農分稻苗散青把  
桃源風土良可樂何恨龍鍾在田野

對雨

飛雨山棚爽繅雲竹巷迷翠藤低拂石黃葉澹霑泥樹  
杪盤飢鶻牆根泣露雞園夫桔槔廢流水滿青畦

贈西山僧

高僧自喜巖下住長見白雲飛復迴半山風吹松子落  
千歲石作蓮花開鳥下林堂待分食龍遊溪水遇浮杯  
吳山楚山聊暫行還把楞伽歸去來

天寧寺和曾得之兼呈彭聲之及雪印

經年不到天寧寺却喜春濃叩竹扃  
二水共明洲外碧千峰如削雨餘青  
謾勞山茗時時煮自笑齋中日日聽  
垂白飽聞高世論巖棲空媿老窮經

初夏

樹暗雲更深鳥啼春已去多謝桃源人  
能留漁父住

為王仲義題雪梅

小橋東郭先生履曲逕西湖處士家  
向暖早看花似雪冒寒更愛雪如花

和何彥正春耕 二首

見說春耕溪水頭賦詩猶憶玉京遊  
莫誇塞北千蹄馬  
寧買江南十角牛

竹間樵逕行應熟花外漁舟望欲迷  
處處稻畦分落照  
荷鋤人去水禽啼

劉承直 一首

承直字宗弼以字行贛州人元進士明初與修  
禮書官國子博士升司業出為浙江按察司僉

事

王子充云劉君工選  
體出入鮑謝之間

秋日東林宴坐

高秋坐虛館颯然神慮清  
迴颺疎雨瀟灑集前楹  
始欣塵壒遠稍覺微涼生  
簷鐸遞相答林蟬時一鳴  
物情各有適吾生豈無營

周子諒

二首

子諒名愷以字行廬陵人與修禮書授工部虞

衡司主事

劉仲修云子諒之文豐而不汎乎辭約而能達其意其詩清新婉麗春容幽遠

讀子書作

學館坐無事故書聊復翫披文既嘗最尋義亦泮渙趨  
前後已逸顧舊新輒竄萬言雖畢陳一理竟未貫往往  
卷未終心目已潰亂易書詩春秋辭簡義亦煥奈何百  
家書纍纍疊几案絲延比葛藟根遠並纏絆雕刻出葩  
卉綴緝呈組纂推以合身心宜若霄壤判吾欲盡其文  
掇取歸爐炭往者予弗及來者予何憚作詩示朋曹無  
乃駭童仆



贈別郭元達

黃鵠乘天風飄飄忽高翔飛飛巢林鳥刷羽情內傷  
豈無凌霄志六翮不得長念子平生意相送以傍徨  
勿言易為別明發各一方悲來解佩劍為子復進觴  
且為游子歌歌詞何慨慷疾風吹征颿旭日在衣裳  
自古有離別各言慎行藏

林弼 三首

弼字元凱初名唐臣龍谿人仕元為漳州路知

事戎申內附以儒士登春官修禮樂書除禮部  
主事歷登州知府有梅雪齋橐

龍州 三首

峒丁峒婦皆高髻白紵裁衫青布裙客至柴門共深揖  
一時男女竟誰分

近水刺桐知驛舍倚山毛竹即人家趁墟野婦沽甜酒  
候客溪童進辣茶

白沙青石小溪清魚入疎罾艇子輕漫說南荒風景異

此時真似剡中行

張

翼 二首

翼 或作翼

字翔南建德人徙居嘉興元至正乙巳

舉于鄉薦主角東書院山長不就吳元年徵入

禮局告歸有梓宇集

沈客子云翔南歸自禮局郎庠延訓諸生家近宣公

祠庭有巨梓集以是名

詩話洪武修禮書吾鄉與者三人徐一夔大章陳世昌彥博及翼也翼所居有巨梓一夔為作記楊廉夫亦有題咏故翼作楊哀辭有云志梓寓榮哀衰兮又新昌乎聲詩梓宇集不傳朱翰

輯馮李英華  
取其詩壓卷

賦得韭溪春水送張別駕

春風吹花澄海門  
韭溪雨足浮春雲  
碧漪分流入流去  
石關倒壓玻璃紋  
使君青驄駐溪側  
檣鼓官船送行色  
片帆直泝五湖風  
水晶宮中夜吹笛

西湖竹枝詞

南高峰北高峰頂齊錢唐江水隔湖西  
不得潮頭到湖口  
郎船今夜泊西溪

詩話辛丑夏留湖上昭慶僧舍時錢陸燦曹潔躬周元亮施尚白諸先生先後來游杭人有持元西湖竹枝詩錢先生甲乙者先生謂曰和者雖多要不若老鐵次日羣公泛舟於湖曹先生引杯曰鐵屋原倡之外誰為擅場各舉一詩不當者罰周先生舉陸仁良貴作云山下有湖湖有灣山上有山郎未還記得解儂金絡索繫郎腰下玉連環施先生舉張簡仲簡作云鴛鴦蝴蝶盡雙飛楊柳青青郎未歸第六橋邊寒食雨催郎白苧作春衣南昌王猷定于一舉嚴恭景安作云湖中女兒不解愁三五蕩槳百花洲貪看花間雙峽蝶不知飛上玉搔頭吳袁子令令昭舉強珣彥柔作云湖上女兒學琵琶滿頭都插開妝花自從彈得陽關曲只在湖船不在家武進鄒祇謨詩士舉申屠衡仲權作云白苧衫兒雙髻丫望湖樓子是儂家紅船撐入柳陰去

買得雙頭茉莉花錢唐胡介彥遠舉徐夢吉德  
符作云雷峰巷口晚涼天相喚相呼出采蓮莫  
為采蓮忘却藕月明風定好迴船蕭山張杉南  
士舉繆侃叔正作云初三月子似彎弓照見花  
開月月紅月裏蟾蜍花上蝶憐渠不到斷橋東  
山陰祁班孫爽喜舉釋文信道元作云湖西日  
脚欲沒山湖東月出牙梳彎南北兩峰船上看  
恰似阿儂雙髻鬟錢唐諸九鼎駿男舉馬琬文  
璧作云湖頭女兒二十多春山兩點明秋波自  
從湖上送郎去至今不唱江南歌予曰諸公所舉  
皆當然未若吳興沈性自誠之作也其詞云儂  
住西湖日日愁郎船只在東江頭憑誰移得湖  
山去湖水江波一處流不獨寄託悠遠且合竹  
枝縹緲之音曹先生曰然於是諸公皆飲予亦  
浮一大白因思舊事四十年矣錄翔南詩具旨  
與沈作略同又吳世顯彥章詞云湖中日日坐

船窗水面鯉魚長一雙好寄尺書問郎信惱人  
湖水不通江意亦相合然俱未及沈之俊逸也

劉儼一首

儼字敬思錢唐人元末隱居西湖明初徵入修  
禮樂書授廣東市舶司令有櫟隱集

詩話敬思為管長史訥之師其卒也管哭以詩  
云痛哭劉夫子如今隔九泉家聲俱溢耳才望  
孰齊肩百氏遭漁獵羣經費討研薦章何懇懇  
束帛竟戔戔東壁星辰表西清雨露邊班陪黃  
閣老名廁玉堂仙禮樂皆新製方輿有續編宣  
麻應內命行李忽南還漢節銜蠻雨黎歌入瘴  
煙客庖魚米賤商舶象犀賸省微官將調郵書  
計遽傳哲人其逝矣小子獨凄然踵接才雖劣

心喪禮自專不知雙眼淚何  
日罷潺湲丁鶴年極稱之

舟中漫興

青天縹緲吹雲衣碧水顛倒插翠微  
三家五家村舍出一點雨點沙鷗飛  
柳絲裊裊拂過艇苔花斑斑生釣磯  
風塵不到是樂土莫怪往來城府稀

魯淵四首

淵字道原淳安人至正辛卯進士江浙儒學提  
舉洪武初徵修禮樂書詔授江西按察司僉事



以病辭有魯道原詩集

詩話道原為沈原昭之師嘗與楊廉夫張光弼  
授文貢院其題入貢圖詩云九州文軌車書混  
萬里梯航玉帛齊感懷詩云越裳翡翠供輸少  
遼海雲航漕運通蓋猶及見元盛時者其後幾  
死於寇極其顛沛晚宿新岑詩云杜鵑山外  
家十里姑惡聲中淚兩行誦之亦可悲矣

題馬文壁秋山圖為盧仲章賦

野館空山裏林泉象外幽淡雲初霽雨紅葉早驚秋路  
轉山藏屋橋危岸倚舟直疑人境異便欲問丹丘

越中避難適周橋

喪亂今如此漂零豈偶然有身長作客無地可歸田  
兵火淒涼夜風塵黯澹天故人知愛客同櫂鑑湖船

長安市

夜泊長安市鄉鄰崇德州驛亭無駐馬堰水有行舟  
壞道蘊荆棘陰房聚魘髏淒涼兵火地人物總荒丘

重九

白鴈南飛天欲霜蕭蕭風雨又重陽已知建德非吾土  
還憶并州是故鄉蓬鬢轉添今日白菊花猶似去年黃

登高莫上龍山路極目中原草木荒

劉永之 二十一首

永之字仲修清江人明初徵士有山陰集

梁孟敬云

仲修遣詞發詠追金琢壁鉅篇短章槩度悉合  
於變風境上而莫之雌雄者簡一溪云先生  
佳不徒深入簡齋門戶亦可與晚唐諸賢白戰  
詩詞格調精工諸體備  
至風淝乎風雅之遺

詩話仲修應聘入都以疾辭其秣陵述懷詩  
云話叢曲臺名秉筆從諸公則亦徵入禮局之  
一人矣宋景濂以辭章翰墨雙絕稱之贈詩云  
多少薦紳求識面江南文價為君低觀集中與

梁孟敬論春秋書謂胡氏之春秋非經之本旨  
自為一書可爾使聖人者若後世之法吏深文  
而巧詆蔑乎寬厚之意此其失非細故也其識  
出環谷東山諸君之上其詩務去陳言取材新  
穎五言如青年杜書曰白髮漢郎官澗水穿林  
去山雲帶雨回雨微簷溜緩風急鴈聲稀野燒  
兼風起邊烽共月升春明三壽草雪映九英梅  
蟹舍能留客漁舟不畏風鹿盧花下轉蒿菰雨  
中鉏白鷗窺殘爽青童埽落花路危楓葉斷石  
險桂根懸底柵成山壘漁梁阻澗泉七言如過  
橋柳暗烏桕樹當戶花開燕入簷近瀑飛雲經  
樹濕穿花流水過橋香朱絃鏤管苔紙銀簾  
秋衾夢摘湖古硯自磨銅雀瓦坐瓊還疊蜀賓  
綸石泉落處寒兼雨楓葉颭來冷帶霜杜若烟  
生螺子港桃花水暖象牙津千峰靜對芙蓉幕  
三峽遙連蜘蛛橋竹嶼暝煙浮翠黛石田秋雨

潤銀沙沙田紫蔗家家熟野徑丹楓處處飛  
底龍飛山客見峰頭鹿過野人知白雲當戶心  
同靜亂竹侵階手自刪何其似姚少監鄭都官也

### 秋懷

涼飈振庭樹浮雲結重陰中情忽不樂拂几彈鳴琴  
冷多苦調零淚霑衣衿遠懷東都士登彼北邙岑  
悵然望京洛五噫發哀吟悠悠千載下誰識古人心

### 登烟雲臺同西峰諸友分韻得跨字

振策履崔嵬飛步凌雲榭俛觀飛鳥翔遠見平江瀉彈

基古桂陰酌酒長松下谷響嘯哀猿林香過山麝祈靈  
醉巫覡尋真望仙駕翠蚪金節導青鸞羽衣跨

訪驛馬精舍能上人不遇識其從孫蕭生進修夜  
坐誦詩次日書此識別留東能公

晨起忽不樂驅騎高原行四山多嵐氣日照孤峰明亭  
午際江渡烟艇浮沙汀登岸迷所適歧路方縱橫忽憶  
驛馬寺久慕能公名詢塗向烟霧阡陌互紆縈漸入石  
路窄松蘿藹冥冥龍象雖寂莫廊廡猶崢嶸道人赴齋

出鍾梵杳無聲款戶識之子開室出相迎宴坐畢餘景  
空花聞夕馨山尊瀉芳醕秋蔬摘霜莖性味空寂旨心  
樂儒雅清夜止西窗宿風條中夕鳴病客旣多感聞此  
心骨驚明當舍之去沿流到江城方從湖海游暫遠林  
壑情山門陰寒沼中涵苔蘚青法源庶無竭歸日濯塵  
纓

過安慶精舍

淮壖古重鎮龍舒實雄冠顯顯青陽公銜命茲屏翰文

能宣皇風武能折兇悍仁能撫士卒知能輯流散孤城  
抗千里一身當敵萬運否絀壯圖時屯負英算城亾遂  
捐軀仗節死國難忠義凜霜日聲名炳星漢我來當夏  
杪延覽遂興歎俯仰成古今興亡猶在眼疲人稍歸郭  
買舍臨江岸午風舟舫集夜霽燈火亂精靈或來往廟  
食儼容觀生為烈士尊死為姦臣憚螭螭吟詩臺千載  
汚青簡

同傳商翁何彥正舟中有懷辛好禮韻



沙際水痕交細草蒙茸長春江下連鴈夜雨同孤舫佳  
期違宿諾歡笑懷前賞餘燼落寒燈臥聞漁板響

劉宗海為余作清江春雨碧嶂秋嵐二圖賦此贈  
之

劉君早年善山水得意往往圖樵漁西昌城西一相見  
忽然贈我雙畫圖圖中似是清江曲春雨蒼茫汀樹綠  
烟中髣髴辨飛帆水際依稀見茅屋漁郎繫船江石上  
一夜磯頭水新長孤村日暮烟火微渡口歸人暝猶往

碧嶂層巒翠轉奇，嵐光秀色含朝暉。  
風林落葉灑青壁，雲壑流泉生翠微。  
我昔結廬此山裏，每愛秋嵐淨如洗。  
經年奔走厭風塵，偶看新圖心獨喜。  
憑君添我小綸巾，明當歸埽山中雲。  
他日君來一相訪，松根為子開柴門。

題金華余仲揚山水

人言吳中山水好，坐思絕境那能到。  
金華山人懷故山，時拂水紈寫幽島。  
贈君此圖更絕奇，妙墨精思奪天造。  
陂陀重阜隱喬木，掩仰遙汀帶文藻。  
石嶠雲生暮色微。

海門潮落秋風早，賀監居臨鑑湖曲。  
子猷宅近山陰道，清清落日櫂船回。  
照水新袍影顛倒，高情千古慕前哲。  
世俗紛華豈堪保，經年烽火遍江南。  
萬壑千峰迹如埽，畸人奔走厭塵濁。  
試觀圖畫開懷抱，思傍幽林結茅屋。  
柴門低映寒藤老，放鶴前山戴笠歸。  
獨抱長鑱拾瑤草。

題古木幽篁圖

近者天下寫竹枝，息齋子昂最奇特。  
金釵折股錐畫沙，直以高情寄豪墨。  
後來小李用家法，更覺縱橫脫羈勒。

御榻屏風或詔寫流落人間豈多得我家真蹟兼數公  
錦囊玉軸複壁中舊宅荒涼經戰伐故物都隨烟燼空  
此圖尋丈小李作位置頗殊標格同半身古樹色蒼潤  
質簫因依相澹濃長林無人秋氣入蜿蜿蛇蛟起幽蟄  
蟪蛄垂絲畫陰靜老鶴刷翎昏雨集黃陵廟前湘水深  
捐玦江臯思俯拾浮槎尋源溯空闊析旌低度玄雲濕  
何郎兄弟最好竒愛此不減珊瑚枝幽居正在蘭峰下  
亦有喬木當窗扉共展長圖幽興發六月涼颼生葛衣

還君珍襲增歎息他日重看覓舊題

陳君心吾以黃鼠筆見貽此筆唯京師多用之江  
南罕得也

冰鼠金毫銳霜筠翠管長攜來南郡遠制出北州良內  
史來禽帖黃門急就章秋林多柿葉揮灑興難忘

送吳德基赴興化令

春江望不極芳草綠江潯千里長沙道孤帆去客心縣  
城依水國吏語帶蠻音到日應無事華亭自鼓琴

經湖口縣

古縣開湖口高檣集岸隈山從廬阜起江向武昌來近  
水皆楊柳荒城半草萊客心元自速更遣曉風催

為高安何思恭題方壺所畫山水

古象山中白晝閒紫烟樓觀鳳笙寒試分玉井三秋露  
戲寫方壺九疊山老樹模糊常帶雨茅茨瀟灑鎮臨湍  
知君隱處渾如此持向荷峰錦水看

題畫鷹

猶記鳴鞘出霸陵  
新豐市北醉呼鷹  
於今豪氣都消盡  
閒看新圖剔鴈燈

題扇

烏絲細寫蠶頭篆  
白紵新裁燕尾衫  
雨過西軒苔色淨  
澗中雲影似江帆

題竹

洞裏仙人白兔公  
手持玉笛向秋風  
彩雲低度天如水  
吹作龍吟三月中

題扇

金鳳洲頭倒玉壺  
銅塘浦口送飛舡  
他時若記分攜處  
花滿春城聞鷓鴣

寄西峰道士

二首

百尺飛樓接太清  
萬年枝上月華明  
鹿車入谷無人見  
應是仙人衛叔卿

石室虛明隔紫烟  
靈文中閔白瑤  
鐫丹書隱字誰能識  
歲月應題建武年



北澗夏日

酒傾蘭勺石泉香  
衣剪荷盤露氣涼  
誰料十年江海興  
閉門疎雨對橫塘

夜宴定侯宅醉中口號

刻羽堂中畫獨明  
將軍夜醉水西營  
青樓小婦新承寵  
彈得涼州第一聲

為彭子弘漁釣圖

彭郎磯畔小茅堂  
露滿秋林木葉黃  
石渚水生魚欲上

一江風雨夜鳴榔

孫作四首

作字大雅以字行一字次知江陰人洪武癸丑  
召修日歷書成除翰林編修以老病乞外授太  
平府儒學教授入為國子助教遷司業有滄螺

集

李武曾云胥元李之人咸襲抱遺老人詩  
派東家子獨以蘇黃為師洵特立之士也

詩話編纂日歷洪武六年九月事也先是徐大  
章報王子充書曰近世論史者莫切於日歷日  
歷者史之根柢也其法以事繫日以日繫月以  
月繫時以時繫年猶有春秋之遺記事之法無

踰此也宋重史事日厯之修必諸司關白如詔  
誥政令則三省必錄兵機邊事則樞度必報百  
官之拜罷刑賞之與奪臺諫之論列給舍之繳  
駁經筵之論答臣僚之轉對侍從之直前故事  
中外之囊封函奏下至錢穀甲兵獄訟造作凡  
有關政體者必隨日以錄歲終監修宰相點檢  
修撰官日所錄事有失職者罰之其慎重若此日  
厯不失則後日會要之修取於此他年實錄之  
修取於此百年之後紀志列傳取於此此宋氏  
之史所以可據也元則制度文為務從簡便不  
置日厯不置起居注獨中書置時政科以一文  
學掾掌之以事赴史館及一帝崩則國史院據  
所付以修實錄若順帝三十六年事既無實錄  
又無參稽之書惟憑采訪以足成之竊恐其事  
未必覈其言未必馴其首尾未必貫也其論實  
自大章發之修日厯老七人孫大雅與馮大雅

自號東家子以文見知於牛士良宋景濂為作  
東家子傳謂他人之文未於理則辭不暢肆於  
辭則理不直惟公洞鑒千古之上折之則理勝  
關之則辭嚴動有據依皆非臆說其推許至矣  
詩絕去元季之習好盤硬語有云蘇子落筆崩  
海江豫州吐句敵山岳湯湯濤濤絕厓岸崿崿  
木石森鋸槩二子低昂久不下數澤遂包龜與  
鯉至今離還呼從賓誰敢崛強二子角吾尤愛  
豫章撫卷氣先愕磨牙咋舌熊豹面以手捫膺  
就束縛士如此老固可佳不信後來無繼作蓋  
欲力追涪翁宜詩  
之不肯猶人也

大堤曲

君騎白馬來我騎青驄去背面不相識兩馬驕嘶住

客中秋夜

故園應露白涼夜又秋分月皎空山靜天清一鴈聞感  
時愁獨在排悶酒初醺豆子南山熟何年得自耘

石菖蒲

曉露飛初濕春苗剪又生靜憐千葉瘦幽喜一峰橫鬱  
鬱明人眼青青異物情安期如可待吾亦埽黃精

送杜孝廉往句容

江東勝地壓西浙句曲山傳天下稀林間風生一虎過

石上月明雙鶴歸我擬華陽裁白恰君如萊子奉斑衣  
日長縣幕娛親地小轎疎櫺入翠微

錢宰 二十四首

宰字子予一字伯均會稽人元進士明初以明  
經徵修禮樂書授國子助教乞歸召較書翰林

加博士致仕有臨安集

徐子元云博士詩如霜  
曉鯨音自然洪亮

黃

才伯云博士病近代新聲太繁刻意古調  
擬漢魏而下諸作補其未馴者詞林稱之

詩話博士吳越武肅王十四世孫孝陵命撰帝  
王廟樂章稱旨每進見輒賜坐侍食嘗賦早朝

絕句云四鼓蓁蓁起著衣午門朝見尚嫌遲何時得遂田園樂睡到人間飯熟時明日文華譔畢帝諭曰昨日好詩朕嘗嫌汝何不故作憂字又曰朕今放汝去好放心熟睡矣乃遣還二十七年詔徵同揭軌等二十六人定正尚書蔡氏傳命開局翰林院賜綺繒衣被入朝班侍衛之首賜飲酒樓還里年九十六乃卒二十四人者黃觀景清在其中實錄特刪去蓋永樂中以名在姦黨故也博士詩波瀾老成諸體悉稱韓宜可唐愚士昏師之

### 擬古七首

出門萬里別行行  
遠防邊相望各天末  
北斗日夜躔四  
運秋復春不見君子還  
燕車北其轍越馬南  
其轅目遠

心愈近悵然徒懸懸黃雲暗關塞路險不見天式微夫  
如何日月忽已遷願言崇明德無為終棄捐

高臺何巍巍參差與雲平玉繩臨雙闕長河流無聲上  
有羽衣人逍遙吹玉笙清響涵明月飛珮何泠泠借問  
弄者誰疑是董僂成曲終再三歎感慨有餘情所悲同  
門友局促趨世榮願將秋水劍為之解塵纓笑呼雙黃  
鵠與子俱遠征

涉海采琅玕紅者珊瑚枝明珠盈懷袖將以遺所思海



濶不得返所寶莫致之爛其納我室抱璞將何為

青青梧桐樹託根在高岡與子新合歡翕如鳳與皇鳳  
皇鳴鏘鏘合歡期世昌歡情一何短離思一何長嗟彼  
籬下菊含英揚其芳晨霜秉貞節寧隨秋草黃終當采  
而佩歲晏夫何傷

河東有織女皎皎雲為章手弄機上絲日夕更七襄織  
成五色文欲製君子裳莫言隔秋水可以駕飛梁睨彼  
牽牛星終日不服箱

故人萬里別海水日夜深南風海上來遺我雙南金不  
見故人面乃見故人心鑄作黃金徽置之白玉琴彈為  
別鶴操間以懷湘吟曲終聽者稀矯首望知音

庭樹日已黃白髮日已短候蟲鳴前除秋霜蕙花晚歲  
月如奔駒六轡不可挽泛舟涉方瀛方瀛水清淺安期  
邈難求吾權亦已返花開醉復斟黍熟飢自飯適然樂  
悟生瑤島諒不遠

分題賦載酒亭送友人之四川

大江發巴蜀岷峨蔚嶢堯子雲性佚蕩逸氣相扶搖灑  
翰騁雄辭凌雲何飄飄終焉歛其華組屨不足驕卓思  
著玄文斟酌倣繇文閎言極幽微繇絡天地交豈無好  
事者載酒與遊遨胡為事黃門投閣竟蕭條龍蛇不知  
藏螻蛄亦見嘲天獨昌其文炳如日星昭子行登斯亭  
英爽或可招謂我欲問奇峽水阻且遙

題雪獵圖

健兒善騎射出獵古戰場白雪日夜飛蕭蕭朔風涼黃

草蔽沙磧馬肥弓力强小隊出漢南十騎如龍驤前驅  
逐猛虎後騎接飛獐翻身激羽箭疊中兩羚羊玄熊何  
前却猛氣亦跳梁南行顧長戟北走脫飛鎗聯鑣愈奮  
捷性命不得將自謂足馳騁意氣何揚揚寧思漢廷將  
英勇除武皇去年出雲中置郡定朔方今年戰高闕夜  
圍右賢王小勇何足矜萬里開邊疆

兵退後作

朔風號枯枝長夜何漫漫微月出復沒零露淒以溥露

薄不足悲嚴霜為之寒飢鳥下叢薄猛虎鳴其間鬼燈  
照虛館落葉何珊珊蕭蕭遠征人載歌行路難我心增  
慘戚豈不思東還欲濟川無梁中道多阻艱弱子病且  
死老妻方憂患明將登前途念我衣裳單斧冰汲澗水  
采薪事朝餐慨彼下泉詩悠然起長歎

泛舟新湖塘次王敬初韻 二首

清賞各有適何異同登攀君舟泊西隩我車上東山林  
光變宿雨溪響洄晴瀾春深飛花歇日入好鳥還佳景

欣所得毋令清興殘俯看縱壑魚仰見培風翰物理固  
有待努力當希顏胡為念窮達戚戚天壤間

湖水日已綠理櫂不可緩雜花當書翻遠樹出雲短沙  
明宿雨霽風急游絲斷悠悠歡賞深歷歷佳趣滿酒盡  
客愁生歌殘離思遠世路方險巖窮居正蕭散出處諒  
何心夕陽起樵管

早春寄鄉中友人

故園花發春又來碧桃半拆棠梨開流鶯踏花酒落杯

花飛落酒相縈迴酒酣起舞落日晚應念長安人未回  
江上舟幾時發拍手醉唱歸去來笑摘花枝簪白髮

雲中兩烈婦

珠展鎮雲中縱游兵掠鄉鄙張思考妻華氏偕  
子婦劉罵賊死之作雲中兩烈婦

雲中兩烈婦風節何雄哉婦姑誓同死軍馬倏已來姑  
言我死命所遭爾方年少不得逃欲自經不得索欲自  
刎不得刀少婦潛致詞不用刀與索兒當激賊怒婦姑

頭共斫姑如湛盧劍罵賊獵獵生剛風婦如黃閭弩蹶  
張放弦氣愈雄厲聲奮激腐賊鋒萬古雙烈誇雲中

題趙仲庸鏡湖圖為洽上人作

趙侯胃中有泉石白髮垂顛人不識丹青不寫四十年  
一見洽師雙眼碧當年王宰浪得名十日五日勞經營  
天機到時一揮灑白雲顛倒秋波明秋波在屋下白雲  
在屋上香鑪秦望天東南蒼巒翠嶽森相向三山落日  
烟水賒秋風舊宅今荷花斷垣蒼石無路入至今人說



放翁家放翁家渺何處阿師出家不歸去不惜千金買  
畫圖笑倚清江看雲樹

長江霽雪圖

昔年壯游下江漢霽雪千峰排兩岸今年看畫憶舊游  
萬里江山入清翫岷峨岡脊來蜿蜒青城一峰高插天  
東馳衡山走千里匡廬五老下與石城北固遙相連冰  
壑雪壑互起伏照見日華破初旭神光混茫元氣浮奮  
如巨鰲簸坤軸爛如秋空雲浩如滄海濤又如瑤臺銀

闕天上頭皎皎白月空秋毫回光下照中流水風吹河  
漢銀雲起中流空闊不勝寒一洗丹碧秋漫漫山川歷  
歷真偉觀來往十年游未半不如雲瀛樓上來倚闌一  
日看遍江南山

題俞景山畫山水帳

老大索居江上樓廿年不出懷舊遊叩門下樓出迎客  
但見絕壑風颼颼岱宗日觀山上頭日出未出蒼烟浮  
嵩高插天太華碧蛾眉青城翠欲流匡廬老泉挂白石

蒼梧水落湘江秋懸厓倚天萬山立翔鸞舞鳳蟠蒼蚪  
幽岑遠樹互出沒白雲不散松風收松根老樵列四五  
招我共入青林幽平生游歷走不遍千里萬里窮遐搜  
如何一日墮我前空翠雜沓來雙眸舉頭問客何因入  
此境迺是手持畫圖來滄州俞君作畫時雅有山林癖  
朝登秦望山萬壑千巖淨橫臆暮上香爐峰海色秋清  
上遙碧歸來放筆傲董源筆底丹青浩無迹海桑一別  
三千年山月江風耿相憶仰觀巖上泉俯看松下石故

人不見空盡圖十幅雲烟卷還客

梧桐樹

梧桐樹一葉墮秋風一葉委秋露明年二月新葉生還  
在今年葉飛處漢宮飛燕近承恩零落班姬不如故君  
不見梧桐樹

分題賦鏡湖送張用中

鏡湖白波木葉稀涼風蕭蕭入客衣李真賜宅已無主  
太白酒船空櫂歸野色驚秋鴻鴈下水聲吹雨鯉魚飛

此時張翰吳中去雲鎖稽山失翠微

題趙仲穆秋山圖

人家水檻接山窗好在江南山水邦  
兩岸雲林皆落日一天島鴈共秋江  
屋頭數遍青巒九松下吟成白石雙  
野服何人正蕭散泊船歸醉酒盈缸

題畫菜

今日荷鋤倦嘉蔬沒四垣客來春酒綠  
風雨夜開園

春深即景

露梢黃鳥啄來禽  
蛙葉青蟲絡樹陰  
又是綠階春雨歇  
滿庭芳草落花深

題秦淮送別圖

綠酒斟來且莫斟  
酒闌歌罷去駸駸  
別懷恰似秦淮水  
流到長江綠更深

題林處士觀梅圖

放鶴仙人不可招  
斷河殘月夜聞簫  
別來欲問春消息  
花落西泠第二橋

揭軌 五首

軌字孟同臨川人洪武初以明經舉除清河主

簿升知縣謝歸教授生徒召定書傳會選

沈山子云

孟同詩以唐人為主集斤斤不爽方之高漫士差優

河北冰泮放舟歸江南奉寄楊南宮

曉來銅雀東風起春水凌亂漳河水郎官驚起解歸舟  
一日風帆可千里侵晨鼓柁發臨清薄暮乘流下濟寧  
南宮先生先去花時想達瓜洲步尋君何處抽風帆

杏花烟雨春江南

春陰

梨花門巷泥活活楊柳窗戶綠陰陰  
軒車不來又幾日風雨相思勞寸心  
舒州紅稻宜晚飯采石碧酒供滿斟  
故人何可久不見我有新詩思共吟

過燕都故宮

八月金輿度玉關芙蓉零落後庭閒  
西宮無復羊車過南苑猶疑鳳吹還  
承露金盤留海上廣寒瓊戶鎖人間



翠華此日知何在黃葉蕭蕭萬歲山

晚歸

苑外金波映水天歸驄蹀躞暮江邊鳳皇臺閣初含雨  
燕子人家又禁烟詩寫桃花歌扇底酒攜楊柳舞樓前  
請看秋雨臙脂井好酒春風玳瑁筵

宴南市樓

詔出金錢送酒壚綺樓勝會集文儒江頭魚藻新開宴  
苑外鶯花又賜醑趙女酒翻歌扇濕燕姬香襲舞裙紆

繡筵莫道知音少司馬能琴絕代無

姜明叔云國初於金陵聚寶門外建

輕烟澹粉梅妍柳翠十四樓以聚四方賓客觀搗盂同詩可知國初搗紳宴集皆用官妓與唐宋不異後始有

禁耳

詩話永樂中蜀人晏振之金陵春夕詩云花月春江十四樓十四樓者來賓重譯清江石城鷓

鴟醉仙樂氏集賢謳歌鼓腹輕烟淡粉梅妍柳翠也姜明叔蓉塘詩話謂皆在聚寶門外然中

既以清江石城為名必不皆在聚寶門矣周吉父撰金陵瑣事謂有十六樓在城內者曰南市

曰北市在聚寶門外之西者曰來賓在聚寶門之東者曰重譯在瓦屑壩者曰集賢曰樂民

在西關中街北者曰鷓鴣在西關中街南者曰醉仙在西關南街者曰輕烟曰淡粉在西關北

街者曰柳翠曰梅研在石城門外者曰石城曰  
謳歌在清涼門外者曰清江曰鼓腹所載特詳  
楊用修藝林伐山遺南市北市陳魯南金陵世  
紀遺清江石城因曲就十四樓之目而誤也相  
傳定正蔡傳書成宴編纂諸臣於醉仙樓上然  
揭孟同詩云詔出金錢送酒壚綺樓高會集文  
儒題曰宴南市樓則非醉仙明矣實錄洪武二  
十七年八月庚寅新建京都酒樓成先是上以  
海內太平思欲與民偕樂乃命工部作十樓於  
江東諸門之外令民設酒肆以接四方賓旅既  
又增作五樓至是皆成賜百官鈔宴於醉仙樓  
九月癸丑定正蔡傳書成賜諸儒宴及鈔俾馳  
驛還是則編纂諸儒先與百官並賜宴者醉仙  
樓也繼以書成賜宴者南市樓也蓋酒樓本十  
六其一北市樓是後被焚此實錄止言增建五  
樓也當日諸樓皆有官妓不獨輕淡粉梅梅妍

柳翠為然故李公秦叔通集句詩於北市則云  
極目亂紅妝於集賢則云妙舞向春風於清江  
則云時時遇雲聲於鼓腹則云舞破日初斜於  
石城則云翠袖拂塵埃於來賓則云烟花象外  
幽於鶴鳴則云白日移歌袖而孟同詩寫桃花  
歌扇底扇底酒攜楊柳舞樓前又云龍虎關河  
環錦繡鳳皇樓閣麗烟花又云趙女酒翻歌扇  
濕燕姬香襲舞裙紆追憶永平都會之盛君臣  
相遇之隆亦一段佳話也

童冀四首

冀字中州金華人洪武丙辰被徵修書後為湖

州府學教授調北平坐罪卒有和陶集

姚廣孝  
云中州

才力老成間學淹貫二十年來奔走南北雖涉  
歷世故樂天知命有合於靖節之志趣其和詩  
如繭抽泉決略不見其  
艱窘矧有韋強者邪

庚子歲五月中從都還阻風于規林

我昔少年日無事幸休居佩弦戒性緩每師董安于迨  
茲桑榆景始悟失東隅屢將孱弱軀觸目風波塗嚴令  
朔風急夜截高郵湖豈不幸利涉為計良已疎古人誠  
垂堂況我疾病餘前塗諒多險欲悔將焉如

水車行

零陵水車風作輪緣江夜響盤空雲輪盤團團徑三丈  
水聲却在風輪上大江日夜東北流高岸低圻開深溝  
輪盤引水入溝去分送高田種禾黍盤盤自轉不用人  
年年祇用修車輪往年比屋搜軍伍全家載下西涼府  
十家無有三家存水車卧地多作薪荒田無人復愁旱  
極目黃茅接長坂年來兒長成丁夫旋開荒田納官租  
官租不闕足家食家家復藉水田力一車之力食十家  
十家不憚勤修車但願人長在家車在軸不憂禾黍秋

不熟

鬲泥行

朝鬲泥暮鬲泥河水澆田河岸低吳中有田多鹵斥河  
水高於田數尺雨淋浪拍岸善崩歲歲鬲泥增岸塍載  
泥船小水易入船頭踏人船尾立吳兒使竹勝使篙竹  
筐漉泥如濁醪此身便作淘河鳥河水終多泥漸少君  
不聞越上之田高於城連車引水千尺坑車聲軋軋夜  
達明田間濁水無時盈吳田苦澇越苦旱越水常枯吳

水滿嗟乎世間至平惟水猶不平請君不用觀世情

贈丹崖隱者

吾聞零陵東有丹崖山青天削出青屏頑丹梯百丈不  
可得仙人煉藥巢其間丹成仙去已千載至今草木餘  
清寒我今弔古訪陳迹石磴側足難躋攀上有撐雲拄  
日之喬松下有懸厓噴壑之驚湍幽林野鳥作人語陰  
澗或有蛟龍蟠何人結屋倚蒼翠抱琴林下聽潺湲乃  
是丹厓仙人老孫子少年早脫名利關祇今五十如處



子雙鬢鴉墨顏渥丹門前種秫釀春酒屋後藝菽供朝  
餐留我石上煮清茗松花落地雲斑斑我家金華五十  
里失身作客天南端徵書昨夜趣歸興葉丹徑下湘江  
灘弘文館深難置足神武門高宜掛冠山中草屋幸無  
恙拂衣歸共浮雲間明年花開儻相憶把酒相望興長  
歎

趙撝謙一首

撝謙名謙一名古則餘姚人洪武初徵修正韻

出為中都國子監典簿罷歸尋以薦召為瓊山

教諭卒於官有考古餘事


黃太冲云先生詩有考古餘事千篇未曾傳世

詩話明祖正韻一書出自獨斷天子考文諸臣敢不敬應揣謙於六書四聲最精焉肯盡棄其學而順帝之則其見熙也必因不苟附和而然不在年少也既歸築考古臺述聲音文字通書成賦詩云文字聲音歎久訛十年辛苦事研磨誰云沈約知音甚未許揚雄識字多魚魯從今堪辨析鼎彝由昔貴摩挲總憐朋舊微鍾子歸卧雲山看薜蘿當知臺名考古心非正韻為今矣

古風次倪安道韻

荒哉周穆王八駿窮萬里朝發崑崙巔夕飲瑤池水空

歌白雲謠千載汙人耳三復祈招詩感歎不能已



明詩綜卷八